

評審感言

黃美娥



臺灣台語 / 散文 / 教師組

這屆教育部主辦ê臺灣台語文學獎散文類教師組，攏總收著五十二篇稿。評審ê工課由何信翰、陳豐惠兩位老師佻我三人做伙擔任。阮咧看稿ê時，毋但愛看台語文用字敢有準確、話路敢有順，嘛著看文章ê寫作工夫表現。逐篇斟酌參詳了後，頭前三名是：

●第一名〈赤跤仔〉

作者用三項故事，寫出佻「赤跤仔」相關ê人生記持。頭一項，伊少年時捌飼過一隻粉鳥仔。這隻粉鳥仔袂搶食，飛ê時會耱頭飛，可惜跤頂ê跤環仔落去，袂當成做賽鴿協會承認ê比賽粉鳥；毋過佇作者孤單寂寞ê時陣，伊煞是作者上知心ê伴。第二項，作者細漢ê時害重病，性命強強咧欲斷去，予一位無醫生牌ê「赤跤仙仔」吳西田救轉來。到尾仔，吳西田因為無醫生牌，予人掠去關，毋過作者對伊ê感恩一直園佇心肝內。第三項，作者自細漢就想欲做老師，雖罔毋是師專抑是師範畢業，伊猶原無放棄。一擺一擺去參加考試，繼續進修，連尾手總算成做正式教師，閣得著「師鐸獎」ê肯定。文章頭尾攏有扣牢咧，寫起來真順；毋但無看輕「赤跤仔」這個歹名，反倒共伊翻轉過來，讀起來真趣味。

●第二名〈58秒〉

這篇寫跳傘，真罕得有人寫這個題材。作者以C-130H運輸機傘兵ê身份，寫伊對飛機頂跳落來彼一下ê驚惶和危險，嘛寫心肝內七上八落ê情形。對半空中落落來，精差佇八秒失手摔落去，抑是五十八秒順順仔落地。作者一秒一秒寫伊按怎踏出機門、按怎算拍仔、按怎感覺風拍佇面，嘛寫心內咧想啥物。教官平常時ê叮嚀恰操課時ê喝聲，嘛穿插佇文章內面，讀起來誠緊張、誠刺激。閣來，作者ê老爸嘛是傘兵，煞因為心臟病發作雄雄過身。全款ê情形後來嘛發生佇伊ê身上，好佳哉有救轉來，才無造成大條代誌。爸仔罔8秒恰58秒ê生死對照，內底閣囤著對老爸無盡ê思念。通篇讀落去，寫甲真幼路，字句真精彩。

●第三名〈海底厝〉

作者對澎湖ê海洋生態真熟似，文中詳細寫出掠「錢鰻」恰「石距」ê步數、方法恰所愛準備ê家私，嘛講著料理、曝焦、焙火恰收藏ê方式。文章內面也有講起，講錢鰻枵饞貪食，石距好玄貪色；人佇海底做厝，才掠會著。題目「海底厝」嘛因為按呢，加深伊ê意義。文章煞尾彼段閣講去到現此時ê網路詐騙會成功，嘛是離袂開咱人ê「貪」恰「色」。對照真自然，收尾真有力，讀落去氣味十足。